

Sistema Atensaun no Responde Sedu (AtReS) iha periodu Maiu-Juñu 2021 kontinua implementa servisu monitorizasaun ba insidente violénsia ne'ebé akontese, iha Munisipiu rua mak Munisipiu Dili no Munisipiu Likisá. Sistema ne'e hanesan baibain parseria ho rede monitorizador iha baze atu halibur informasaun kona-ba insidente violénsia sira. Insidente ne'ebé rekolla ona regulármente haruka ba koordinador munisipiu sira hodi rejistu iha sistema baze dados nasional ho sistema online. Jestor baze de dados iha nasional uza dados ne'e hodi halo verifikasaun ikus no haruka ba jestor programa hodi analiza ba kauza sira ne'ebé hamosu insidente violénsia ne'ebé akontese. Ba maluk sira ne'ebé interese ba dados insidente no atividade prevensaun konfliktu no harii dame comunidade ne'ebé akontese iha Timor-Leste, bele asesu iha www.atres.belun.tl

Revista situasaun periodu Maiu-Juñu 2021, kobre nafatin iha Munisipiu Dili no Likisá ho postu administrativu lima ne'ebé iha Munisipiu Dili Postu Administrativu rua no Likisá mak Postu Administrativu tolu. Parseiru monitorizador hamutuk na'in 4 (mane hotu), Postu Administrativu Likisá Vila Koordinadora Munisipiu Likisá mak monitoriza direitamente insidente iha terenu (feto). Dados insidente iha Munisipiu rua periodu ne'e ho deskreve tuir mai:

ASUNTU NE'EBÉ PRESIZA TAU ATENSAUN

- ▶ **Violensia domestika 10**
- ▶ **Insidente violensia tanba disputa rai 8**
- ▶ **Abandonu no violasaun seksuál ba menor idade 2 no asediu seksuál 1**

Total Insidente Rekorda iha Munisipiu 2 Periodu Relatoriu (Maiu-Juñu)	
Munisipiu	Total Insidente
Dili	64
Likisá	39
Grand Total	103

INSIDENTE VIOLÉNSIA IHA DILI HO LIKISÁ, PERIODU MAIU-JUÑU 2021

Belun ho nia Sistema AtReS iha periodu Maiu – Juñu 2021 ho apoiu parseiru husi Rede Asia Pacific Partnership Atrocity Prevention (APPAP), kontinua rekolla dados insidente iha Dili iha postu administrativu Dom Aleixo no postu administrativu Cristo Rei, no Likisá iha postu administrativu Likisá Vila, Bazartete no Maubara. Insidente violénsia ne'ebé akontese iha periodu ne'e, hamutuk 103. Numeru insidente ne'ebé rekolla iha periodu ne'e, entre munisipiu Dili ho Likisá kontinua hatudu percentajen ne'ebe boot liu iha munisipiu Dili ho 62% enkuantu iha Likisa ho 38% husi total insidente 103.

Haree husi jéneru perpetrador, iha insidente 83 mak envolve mane, insidente 6 mak envolve fetu, 6 mak envolve fetu no mane, enkuantu insidente 8 mak la hatene envolvimentu jéneru ka deskoñesidu. Enkuantu vitima husi insidente ne'e, mane 66, fetu 25, no vitima fetu no mane hamutuk 11 no la hatene 1.

Perpetrador nia pozisaun ka status sosial barak liu mak seluk no deskoñesidu hamutuk 30 (seluk 26 no ema deskoñesidu 4). Tuir fali mak membru familia hela iha uma seluk iha 15, viziñu iha 12, membru familia ne'ebé hela iha uma hanesan 11, PNTL 10, la hatene 9, dezempregu 8, to'os ka natar ka animal na'in 5, estudante 4, membru grupu Arte Marsial 4, membru Konsellu Suku 3, ofisial governu 3, lider relijiaun no veteranu ida-idak 1.

Sasan ne'ebé uza iha insidente ne'e mak ibun (istori malu, haksasuk malu, diskute malu, sst) 52, isin lolon (ez. liman, ain, uza nehan hodi tata, sst.) 44, ameasa liafuan ka fiziku hamutuk 33, fatuk 13, seluk 11, ai dona, besi kanu, sst iha 4 no rama ambon ka fisga iha insidente 1.

Maneira ne'ebé uza barak liu hodi halo violensia iha periodu ne'e mak agresuun fiziku uza iha insidente 38, deskute malun uza iha insidente 32, toda iha insidente, ameasa iha insidente 7, estraga propriedade iha insidente 5, abandonu iha insidente 3 Provoka malun iha 2, tolok iha 2 no maneira sira seluk mak hanesan ataka malun, naok, irresponsabilidade ba pasajeiru, irresponsabilidade ba kontratu, suisidiu, obriga fetu atu koa'lia ho autor, no uza forsa obriga comunidade halo swab test.

Kauza husi insidente periodu ne'e jerálmente mak insatisfasaun ba hahalok entre parte sira (ez. liga ba hahalok no liafuan, desizaun governu nian liga ba Estadu Emerjensia (EE) no Serka Sanitaria (SS), problema ekonomia, irresponsabilidade parte balun liga ba kuidadu animal nian), disputa rai, lanu, deskonfia malun, diskorda malun, odiu vingansa ba problema pasadu, la halo tuir regra serka sanitaria nian, abandonu ka nega oan husi rezultadu adulteiru, defamasaun ka duun malu buan, la halo tuir regras tranzitu nian, no kauza menor sira seluk mak hanesan hadau malu rekursu naturais (bee mos), no naok. Iha insidente 13 mak la hatene nia kauza.

Konsekuensia husi insidente sira ne'e fetu ida mate, ema hetan kanek todan iha 7 (mane 6, fetu 1), ema hetan kanek kmaan iha 20 (mane 17, fetu 3), ema sente la seguru no halai husi fatin insidente iha 3, uma ka konstrusaun rahun ka sunu 7, uma ka konstrusaun aat 6, transporte estraga, sunu ka aat 1 no sasán seluk aat iha 5.

Husi insidente sira ne'e iha insidente 7 mak monitorizador ka koordinador munisipiu AtReS hanoin katak, insidente violénsia ne'e bele kontinua ka akontese fila fali, tanba problema la tau atensaun ho didi'ak, husi parte seguransa no parte kompetente sira, odiu vingansa sei kontinua eziste entre parte sira, nune'e bele hamosu insidente iha tempu oin.

INSIDENTE VIOLENSIA DOMESTIKA 10 IHA DILI NO LIKISÁ

Violénsia doméstika iha periodu ne'e akontese iha postu administrativu Cristo Rei (6), postu administrativu Maubara 2, Likisá Vila 1 no Bazartete 1. Akontese entre parseiru intimu iha 7 no entre membru familia hela iha uma hanesan iha 3. Kauza husi violénsia ne'ebé akontese tanba insatisfasaun ba hahalok entre parte sira hanesan deskonfia malun komete adulteiru,

lanu, problema ekonomia uma laran, parte ida bandu atu la tuir treinu arte rituál iha tempu kalan, no tanba parte ida halo lakon parte seluk nia sasán. Husi insidente 10 ne'e, insidente ida de'it mak intervein husi parte Polísia Nasionál Timor-Leste (PNTL), enkuantu insidente 3 membru família husi perpetrador no vítima mak intervein. Insidente 2 viziñu no membru konsellu suku mak intervein. Insidente 2 seluk la iha ema ida mak intervein. Fatores kontribui ba insidente violénsia hirak ne'e mak sentimentu xiumentu, osan no odiu.

INSIDENTE VIOLÉNSIA TANBA DISPUTA RAI IHA 8

Insidente violensia tanba asuntu rai no propriedade iha periodu ne'e hamutuk insidente 8 iha munisipiu Likisá (Likisá Vila 3, Maubara 2 no Likisá vila 1). Insidente ne'ebé akontese liga ba Disputa iha Munisipiu Likisá mak problema rai ba uma, rai eransa, rai ne'ebébeiala sira entrega ona ba parte Igreja maibé jerasaun sira hakarak atu foti fali, disputa baliza rai no hadau malun rai komunitaria entre suku sira. Enkuantu insidente ne'ebé akontese liga ba Disputa iha Munisipiu Dili mak problema rai liga ba baliza rai entre disputante no rai eransa.



Maioria mane hanesan perpetrador iha insidente 6 enkuantu insidente rua seluk perpetrador mane no feto. Vítima iha disputa rai sira ne'e mesak mane de'it. Husi insidente 8 ne'e, insidente 2 mak hetan intervensaun husi membru konsellu suku no PNTL, insidente 7 seluk, membru konsellu suku, viziñu no membru familia husi perpetrador no vítima mak intervein enkuantu insidente 1 seluk, la iha ema ida mak intervein.

ABANDONU NO VIOLASAUN SEKSUÁL BA MENOR IDADE IHA 2-ASEDIU SEKSUÁL 1


Abandonu no violasaun seksuál ba menor idade iha periodu ne'e iha insidente 2 no asediu seksuál 1, akontese iha munisipiu Likisá, postu administrativu Likisá Vila no Maubara. Insidente rua uluk, akontese wainhira rezultadu adulteiru husi vítima. Insidente ida perpetrador aseita responsabiliza ba oan maibé lakohi kaben ho feto ne'ebé nia fó oan, no ida seluk akontese wainhira perpetrador nega oan ne'ebé feto kous, wainhira feto ba fó hatene no reklama ba perpetrador atu responsabiliza ba aktus ne'ebé sira komete hamutuk. Asediu seksuál akontese wainhira perpetrador obriga no duni tuir vítima iha dalan atu koa'lia, maske vítima lakohi atu koa'lia ho perpetrador iha dalan.

Iha buat oiain mak sai kauza ba insidente hirak ne'e mak hanesan, insatisfasaun ba hahalok entre parte sira, mane konsidera feto fraku no la iha korajen atu defende nia an rasik, nune'e nia bele domina. Husi insidente 3 ne'ebé akontese, membru konsellu suku no PNTL intervein iha insidente 2 enkuantu ida seluk, membru konsellu suku de'it mak intervein.

GRAFIKU KARATERÍSTIKA JERÁL INSIDENTE




Fatin Insidente Akontese




Fator Sira Hamosu Insidente




Sasan Ne'ebé Uza iha Insidente



Impaktu Insidente





ATIVIDADE PREVENSAUN KONFLITU NO HARII DAME

Programa SI-UNW

► **Atividade Treinamentu Preparasaun Survey kona-ba Impaktu Lei Kontra Violensia Domestika**

Belun ho apoiu fundu husi Uniaun Europeia liuhusi parseiru UN Women Timor-Leste, partisipa iha formasaun kona-ba objetivu no metodúlojia ba peskiza impaktu implementasaun husi Lei Kontra Violénsia Doméstika (LKDV) iha sosiedade. Treinamentu ne'e realiza husi meius virtuál liuhusi zoom durante loron lima iha, iha loron 30 Maiu, loron 1 to'o loron 3 Juñu no kontinua fali iha loron 8 Juñu 2021, fasilita husi ekipa tekniku Instituisaun Nossal iha mahon Universidade Melbourne. Iha loron 23 Juñu, Ekipa pilar I kona-ba poltika no lejislasaun husi programa Spotlight Inisiativa.

Peskiza ne'e hahú ho parseiru relevante sira iha Dili, inklui comunidade LGBTI husi NGO CODIVA no Arcoiris, liu husi foku ba diskusaun grupu (FGDs). Total participante FGD hamutuk 21 (nain 12 husi CODIVA no nain 9 husi Arcoiris). Partisipantes entrevista hamutuk nain 18 (feto 12, mane 6) mai husi Casa Vida, representante Sekretaria Estadu Igualdade no Inkluzau, Polísia Nasionál Igualdade no Inkluzau, Rede Feto, Justice System Monitoring Programme, Ministeriu Solidariedade Sosiál no Inkluzau, Defensoria Públiku, Fokupers, Pradet, Arcoiris, CODIVA, Provedoria dos Direitos Humanus no Justisa no Asosiasaun Difisiente Timor-Leste. Peskiza Belun ne'e realiza servisu hamutuk UN Women ho apoiu tekniku husi Instituisaun Nossal.



Programa Norma Sosiál-UNFPA

► **Atividade peskiza Norma Sosiál Iha Munisipiu Dili no Ermera**

ONG Belun ho Nia Pillar Peskiza no Dezenvolvimentu polítika hametin parseria ho UNFPA, liuhosi Programa Spotlight Inisiativa *implementa Peskiza norma sosiál ho foku ba Impaktu Asesu Pornografia ba Violénsia Kontra Feto no Labarik Feto sira*. Objetivu peskiza ne'e atu halibur opiniaun públiku nian hodi hametin no dezenvolve polítika no norma – norma sosiál ba prevene violénsia hasoru feto no labarik feto sira. Metodú husi peskiza ne'e mak foku ba diskusaun grupu.



✚ **Atividade Peskiza iha Dili**

Atividade (FGD) hahú iha dia 24 Juñu ho participante nain 10 (feto 3, mane 5 no trans men nain 2) representa sosiedade sivil 7 iha Munisipiu Dili hanesan parseiru CODIVA nain 2, AIFeLa 2, Fundasaun Hak 2, ACbit 1, Rede Feto, 1, Raes Hadomi Timor Oan 1, no Fokupers 1).

Atividade Peskiza iha Ermera

Atividade FGD iha munisipiu Ermera hahú iha loron 28–30 Juñu 2021, kobre postu Administrativu Ermera no Railako ho total FGDs 8, ho total partisipante hamutuk 70 (feto 32, Mane 38 inklui mós ema ho defisiénsia hamutuk 31) ne'ebé fahé ba iha kategoria 3 (joven feto ho mane idade 18-24, adultu sira ho idade 34 ba leten no ema ho defisiénsia).

KONA-BA REVISTA NE'E

Desde estabelesimentu Sistema AtReS iha Belun iha tinan 2008 to'o 2016, sistema ne'e kobre Munisipiu hotu iha Postu Administrativu 43, maibé ho limitasaun finanseiru ne'ebé organizasaun hasoru, iha 2017 sistema ne'e para provizoriu. Hahú reativa fali iha 2018 ho apoiu husi UN Women ho Programa Feto Pas no Seguransa ho area kobertura ba de'it iha Munisipiu Baukau, Covalima no RAEOA. Iha mediu 2019 (Maiu – Setembru) kobre tan ba Munisipiu Dili (iha postu administrativu 6) ho apoiu finanseiru husi DAP-DFAT. Iha tinan hanesan, ho apoiu Governu Alemaña, GIZ, sistema AtReS kontinua reativa fali iha Munisipiu 4, Dili, Baukau, Lautein no Vikéke (Postu Administrativu rua kada Munisipiu). Iha 2020 ho apoiu Sekretariadu g7+ reativa iha Munisipiu Likisá no ho apoiu UNDP nia Programa Sistema Justisa reativa tan iha Munisipiu Covalima. Iha Jullu 2020 tanba limitasaun orsamentu sistema ne'e paradu provizoriamente to'o Dezembru 2020 no iha tinan 2021 ho apoiu husi Rede Asia Pacific Partnership Atrocity Prevention (APPAP) no reativa fali iha tinan 2021 iha munisipiu 2 iha Munisipiu Dili (postu Administrativu 2) no iha Munisipiu Likisá (Postu Administrativu 3)

Revista situasaun ne'e relata kona-ba asuntu xavi relaciona ho insidente violénsia no tendensia husi dadus monitorizasaun liuhusi Sistema Atensaun no Responde Sedu (AtReS) Timor-Leste durante Maiu-Juñu 2021 iha Munisipiu, Dili, no Likisá. Tuir lolo'os revista ne'e publika iha Fulan Maiu maibé tanba erru tekniku iha website belun nian, estadu emergjensia no serka sanitaria relaciona ho pandemia COVID-19 iha munisipiu Dili no mos kestaun tekniku sira liga ba internet ne'ebé la estavel implika mos ba servisu Sistema AtReS nian iha terrenu, ne'ebé ikus mai implika mos ba publikasaun ne'ebé tarde. Atividade sira ne'e hetan apoiu fundu kiik hisi Rede Asia Pacific Partnership Atrocity Prevention (APPAP).

Informasaun kle'an liu iha www.atres.belun.tl

Atu hetan informasaun kléan liutan, favor kontaktu:

Luis da Costa Ximenes, Diretór Belun, luis.belun@gmail.com

Romaldo Caetano, Jestór Dadus AtReS: romaldo.belun@gmail.com

Jesuína Maria do Rosário Abel, Jestor Programa AtReS, jesuina.belun@gmail.com